

Rau Ite Inim Ru To Paulus Imbooda Ila To Yesu Korin 2 Korin—2 Corinthians

¹ You Paulus. Maaron itaghon tau lolo ve ighur ghou nanim mbanjoona to Yesu Krisi. Yeru tonjvetaz toit Timoti, nimbood rau tonene ilat to yam to aneep ila lupuun to Maaron izi ndug Korin. Ve yam moghon maau. Rau tonene ilup gham toman Maaron tamtoghon toni patabuana tisob to tineep irau taan suruvu to Akaia ne paam.

² Poia to Tamaan Maaron ve Tiina toit Yesu Krisi iza tiam, ve tingin gham aneep pool toman lolomim luuma. Onoon.

Maaron iuluul ghiit pa patanani toit, lesu tauul nditaad pa patanani todi

³ Lolood poia pa Tiina toit Yesu Krisi Tama Maaron, ve tapaiti pa poia toni. Pasa, ye lolo isamin ghiit ve iuluul ghiit. Ye Maaron to irabrab ateed ve ipapalot ghiit irau sawa isob. *Ep 1:3; 1Pe 1:3*

⁴ Sawa isob to iit taneep ila patanani lolo, ye irabrab ateed ve ipapalot ghiit. Leso anaad tapalot nditaad pida to tineep ila patanani lolo, ve tarab atedi. Pasa, ulaan to taghamghami ila toni, nene ipapalot ghiit. Tauto iit irau tarab nditaad atedi ve tapalot di. *Ro 15:5; 2Kor 7:6*

⁵ Onoon, iit to tataghon Krisi, tambaad patanani naol tanimale ye tau. Eemoghon ighaze tambaad patanani tintina, nene pale ye tau irab ateed, ve

tagham palotiinj tiina ila toni. *Mbo 94:19; 2Kor 4:10; Kol 1:24*

⁶ Sawa to yei nimbaad patañani, nene pa ipalot gham, leso ayoon ariña pa taghoniinj ataam to Maaron ve igham mulin gham. Pasa, ighaze Maaron ipalot ghei ve niyoon ariña, nene pale ngar to nighami, ipalot gham paam ve ayoon ariña pa badoon patañani animale yei. *2Tim 2:10*

⁷ Tovenen yei nighur ila ariña nighaze: Yam pale ayoon ariña. Pasa, yei niwatag: Ighaze itinja talup ghiit pa badoon patañani, nene pale Maaron irab ateed ve itinja tagham palotiinj ila toni. *Ro 8:17*

Paulus ipaesia patañani to ivot pani izi taan suruvu to Asia

⁸ Yam tonvetaz, yei nighaze yam awatag patañani to ivot payei izi taan suruvu to Asia. Patañani to ivot payei, nene tiina kat. Irau nimbaada maau. Tovenen sawa tonenen, nigham ngar nighaze irau nineep maau, pale nimaat. *Mbanj 19:23+; 1Kor 15:32*

⁹ Onoon kat. Sawa tonenen, nighita nighaze lemai ataam eta muul maau. Yei ninimale ngeu to tingabiiz saveej toni ve tighaze ye pale imaat. Eemoghon patañani tonowen ivot payei, leso ninumeer taumai sob, ve ninumeer Maaron. Pasa, ye moghon irau ipamundigin yes mateenja.

¹⁰ Tovenen patañani tiina to ivot payei, nene ini-male yei nineep ila naal avo. Eemoghon Maaron igham mulin ghei pa patañani tonowen. Tauto nighur ila ariña nighaze muri, ighaze patañani ivot payei muul, ye pale igham mulin ghei. *Ro 8:35+*

¹¹ Eemoghon yam irau auul ghei ve aghur ghei ila sunjuun tiam. Ighaze agham tovene, Maaron pale iloon sunjuun tiam, ve iuul ghei itaghon tau poia toni. Leso yamña ival tiina lolomim poia pani, ve apaiti. *Ro 15:30+; 2Kor 4:15; Pil 1:19*

Paulus ipaesia pughu tau itoor ngar toni ve ila Korin maau

¹² Mbeb tiina eez to yei nipakur ghei pani, nene vene: Niyamaan taumai nighaze: Ngar to nighamghami irau ndug ndug, yei nitaghon ngar to tamtoghon to taan tipaiti ne maau. Poia to Maaron, tauto ipamundigin ghei ve nimbesmbees pani toman lolomai ee moghon, ve nighamgham ngar to ingalaan ila ye mata. Ve ngar tonene, yei nipatoon katini payam. *1Kor 1:17, 2:4,13; 2Kor 2:17; 1Tes 2:10*

¹³⁻¹⁴ Ve saveen to nimbooda payam ne, pughu eta iyoon maau. Saveen tiei isob, ngara ineep ghazona. Irau awaata moghon ve aghazon pani. Onoon, sawa tonene, yam pida avaat aghazon payei kat sone. Eemoghon naghaze le ngar tiam ivot ve aghazon kat payei. Leso sawa to Tiina toit Yesu imuul inim, tinimim iza payei, inimale yei tinimai iza payam. *2Kor 5:12; Pil 2:16; 1Tes 2:19*

¹⁵⁻¹⁶ Muun, naghita naghaze yam tinimim iza payou ve uraat tiou. Tauto sawa tonenen, matag ingal naghaze nalat naghita gham muun. Le isob, ghoron nala taan suruvu to Masedonia. Ve sawa to napul Masedonia, ghoron namuul nalat naghita gham muul, ve aghur ghou malmalig nala pa Yudea. Leso Maaron ipalot gham pae ru itaghon laghoon ru to naghami ne. *Mban 19:21; 1Kor 16:5+*

17 Eemoghon ngar tiou tonenen ighur maau. Onoon muun, you nasaav payam naghaze: “You pale nalat.” Eemoghon muri, nator alinag naghaze irau nalat maau. Ve yam aghita ghou vena? Aghaze you nagharaat poian ngar tiou maau, tauto natortoor alinag? Ma aghaze naghama kaarom ve nambua sorokin saveen nanimale yes to titaghon ngar to taan, tauto saveen ru “Vee” ve “Maau” ivotvot ila avog, ne?

18 Aloon. Maaron toit, ye isasavia saveen onoon moghon, ve itataghon saveen toni irau sawa isob. Ve yei tovene paam. Irau nitortoor alinamai maau. *1Kor 1:9; 1Tes 5:24*

19 Pasa, Maaron Natu Yesu Krisi to yeru Silas ve Timoti nivotia varu payam, ye itortoor alina maau. Ighaze ye imbua saveen pa mbeb eta ighaze: “Vee, pale naghama,” nene irau itoor alina muul maau. Sawa isob, ye itataghon saveen toni. Ve ila uraat toni, Maaron isaav “Vee” pa saveen mbuaan toni to naol ne. *Mban 18:5*

20 Pasa, sa saveen to Maaron imbua, nene Krisi to ighama uraata ve anona ivot. Tauto moghon moghon ighaze tapait Maaron iza pa tapiri ve poia toni, iit tasavsaav taghaze: “Onoon” ila Yesu Krisi iza. *Ro 15:8+; Syg 3:14*

21-22 Maaron tau ipapalot ghei toman gham. Tauto iit tasob taneep tunja ila to Krisi. Ye isia ghiit tanim le, ve ighur Avuvu Patabuan ila lolood wa. Avuvu tonene inim ghilaloon pait ighaze iit tamtothon to Maaron. Ve inim pughu pa mbeb naol to pale Maaron ighama di pait. Tovenen iit tawatag: Sa mbeb to Maaron imbua saveen pani, ye pale ighama pait. *Ro 8:16+; 2Kor 5:5; Ep 1:13+*

²³ Ila Maaron mata, saveeņ to naghaze nasavia, nene onoon. Pughu to nalat maau, nene vene: You lolog pa nasavia saveeņ ariana payam, ve naghham gham lolomim isami malep.

²⁴ Alooņ. Yei nighaze nitatan gham azi, ve niņgin ghurla tiam ne maau. Yei niwatag: Yam ayoon ariana pa ghurla tiam wa. Yei nighaze itinja talup ghiit ve tagham uraat. Leso niuul gham ve aneep toman lolomim poia. *1Pe 5:3*

2

¹ Pughu to nalat maau, nene vene: Papazogi to nalat tiam, naghham saveeņ ariana payam, ve igham lolomim isami. Ve ņgar tiou iyaryaan naghaze ņgar tovene ivot muul malep. Tauto nalat maau.

² Pasa, ighaze naghham lolomim isami, nene pale sei masin tigham ghou lolog poia? Maau. Pasa, yam to nawaghmun lolomim, yam moghon to irau agham ghou lolog poia.

³ Tauto nalat maau, ve nambood rau ilat pa napasaluņgan gham. Pasa namatughez: Ighaze pataņani inepneep sosood ve nalat, nene pale agham lolog isami. Eemoghon you naghaze le yam agham ghou lolog poia. Ve you naghur ila tovene: Ighaze ataghon ņgar to igham ghou lolog poia, nene pale yam asob lolomim poia paam.

⁴ Rau ariana tonanan, matag suru izizi ve nambooda. Pasa, naghham ņgar naol payam, ve lolog ipataņan kat. You nambood rau tonanan pa naghham gham lolomim isami maau. Nambooda ilat tiam, lesa aghilaal aghaze lolog payam kat. *Mbaņ 20:31; 2Kor 7:8+*

Yes Korin irau tipul sosor to ngeu to igham sosor

⁵ Ngeu to muun igham ghou lolog ipatajan, ye igham sosor payou moghon maau. Ye igham gham asob lolomim ipatajan paam. Eemoghon irau avog ila pa mbeb tonenen kat maau. Pa vene, naghham ngeu tonenen lolo isami. *1Kor 5:1+*

⁶ Patanjani to yam ival aghuri pani pa anjal mata, nene iraua.

⁷ Tovenen aazne, yam irau apul sosor toni, ve arab ate ve apaloti. Pa vene, lolo isami le isami kat, ve patanjani tonenen itatani. *Lu 17:3*

⁸ Tovenen you naghaze napalot gham pa apatoon ngar poia pani, lesu iwatag ighaze yam lolomim pani.

⁹ Pughu to nambood rau ariaja tonanan payam, nene vene: Naghaze natoov gham ve naghita: Pale ataghon alinag pa ngar to naol ne, ma maau?

¹⁰ Ve yam aloon alinag ve aghur atia pa ngeu tonanan wa. Tovenen aazne, yam irau lolomim isamini ve apul sosor toni. Ve ighaze yam apul sosor to tamtoghon eta, nene you paam, pale napul sosor toni. Sa sosor to ye igham payou, ila Krisi mata, you napul sosor toni. Nene poia pa naghham tovene, lesu nauul gham.

¹¹ Tovenen iit irau tapul sosor toni. Pa vene, Sadan itombaan ghiit ve ilib pait. Eemoghon iit takankaan pa Sadan ngar toni maau. Ataam naol to ye itovtoov ghiit pani, iit tawatag di wa. *Lu 22:31+*

Uraat tau to yes mbanjoonja

¹² Sawa to nala navot ndug Troas pa navotia varu poia to Krisi padi, naghita naghaze Tiina toit ikaak ataam payou pa naghama uraat izi tonowe.

¹³ Eemoghon lolog ipatajan, ve naghama ngar naol. Pasa, naghaze pa naghita itag ite Titus tonowe. Eemoghon maau. Tovenen yeiņa yes Troasa nikis nimamai le isob, ghero napul di, ve namundig nala pa taan suruvu to Masedonia. Leso nakaal Titus izi tonowe. *2Kor 7:5-7*

¹⁴ Ve you napait Maaron toman lolog poia. Pasa, sawa isob, ye imuņ payei ve ipapalot ghei pa uraat tiei. Ila uraat to Krisi, yei ninimale yes to tilaagh toman daba to ndaaba to iparab ariņa ve ilib pa malmal tiina.*

Uraat tiei, nene ataam to Maaron ipaghazonan tamtoghon pa Krisi varu. Varu tonowen, nene inimale naunaņ poia to vuzi ila irau ndug.

¹⁵ Onoon kat. Yei uraata to Krisi ninimale nau-nauņ vuzi poia to ye igham pa Maaron inimale watoonrau. Tamtoghon to nineep ila lolodi ne, tisob tiyaaz nau-nauņ tonene vuzi. Yes to Maaron ighamgham uraat padi pa igham mulin di, ve yes to titaghon ataam to pale igham di tilaledi ne paam.

¹⁶ Yes to pale tilaledi, tiyaaz nau-nauņ tonene vuzi poia maau, inimale mateeņa vuzidi. Ve nau-nauņ tonene pale inim pughu pa timaat ve tilaledi. Ve yes to titaghon ataam to nepoon poia, tiyaaz nau-nauņ tonene vuzi inimale mbeb poia kat. Pasa,

* **2:14:** Ighaze ndaaba to Rom tilib pa malmal tiina eta, nene tighereb koiadi pida ve yesņa timuul tila pa ndug tiina Rom. Ghero ndaaba tonowen toman daba todi tilaagh ila ndug lolo toman koiadi tonowen, ve ival tiina tighereb di ve tipakur di.

ipatoon di pa ataam to tigham nepoon poia ila to Maaron. Uraat to Maaron ighuri inim nimamai, nene patañani. Sei iraua? *1Kor 1:18; 2Kor 4:3; 1Pe 2:7+*

¹⁷ Tamtoghon katindi tilaghlaagh ve tivovotia Maaron aliña inim ataam pa tiyou yaam to tamtoghon. Eemoghon yei nineep ila to Krisi, ve Maaron tau ighur ghei pa uraat. Ve yei niwatag Maaron ighitghita uraat tiei. Tauto nighamgham uraat toman lolomai, ve nivovotia Maaron aliña denja pa tamtoghon. *2Kor 1:12, 4:2; 1Tes 2:5; 1Tim 6:5*

3

Uraat to Paulus ipatoonja ighaze ye mbanjoña to Krisi

¹ Vena, saveeñ tiei tonene, yei nisavia pa nipait taumai muul, leso aghur ila uraat tiei? Maau. Onoon, tamtoghon pida tikis ledi rau to ipatoon di ighaze izadi pa uraat todi. Eemoghon yei lemai pughu eta pa nipatoon rau tovene payam, ma nighason gham pa ambood rau tovene payei ne maau. *2Kor 5:12, 10:12*

² Pasa, yam taumim to anim rau payei. Uraat to nighami ila lolomim ve anoña ivot, tauto ipatoon ghei ighaze izamai pa uraat to nighamghami. Saveeñ isob to rau tonenen ineep ila yei lolomai ve ineep ila yam lolomim paam. Rau tonenen, tamtoghon tisob irau tiwaata ve tigham ngar pani, leso tighur ila saveeñ tiei. *1Kor 9:2*

³ Tovenen yam taumim animale rau to Krisi to ineep ghazonja. Rau tonenen, nene uraat to nighami ila lolomim ne anoña toni. Krisi imbooda

pa mbeb eta inimale gabgab maau. Imbooda pa Maaron mata yaryaara Avuvu. Ve imbooda ıla yaam babañadi inimale Maaron igham pa tutuun to Mose ne maau. Ye imbooda ıla tamtoghon lolodi. *Igham 24:12; Yer 31:33; Ezek 36:27; 1Kor 3:5+; Hib 8:10*

⁴ İla Maaron mata, yei nighur ıla ariana nighaze saveeñ tonene, nene onoon. Pasa, Krisi ineep toman ghei pa uraat tiei.

⁵ Eemoghon yei irau nipait taumai maau. Pasa, irau nigham uraat tovene ıla taumai tapirimai maau. Maaron ipapalot ghei, tauto niraua. *Yo 15:5; 1Kor 15:10; Pil 2:13*

⁶ Tovenen Maaron tau igham ghei nirau uraat toni, ve ighur ghei ninim mbesoona pa ataam paghu to yesna tamtoghon toni tilup di tinim ee moghon. Ataam tonene, nene ataam to taghoniin tutuun to timbooda ne maau. Nene ataam to Maaron Avuvu to itortoor ghiit tanim paghu. Pasa, tutuun to timbooda, nene igham ghiit tamaat. Ve Maaron Avuvu, ye igham ghiit taneep poia ıla to Maaron. *Yo 6:63; Ro 7:6; Ga 3:10+; Hib 8:6+*

Ataam paghu to Krisi ilib pa ataam mungina to tutuun

⁷ Ataam to muun tamtoghon timbees pa Maaron, nene igham ghiit taneep ıla ataam to mateeñ.*

* **3:7:** Ataam mungina to tutuun, nene vene: İghaze tataghon katin tutuun tisob to Maaron, nene pale taneep pooi. Ve ighaze maau, nene pale mbalmbali to Maaron iza toit.

Eemoghon sawa to Maaron irab tutuun tonowen ila yaam, ve igham pa yes Israela, nene inim toman nguruba ve tapiri tiina. Tauto yes Israela irau timbatut Mose nagho mala maau. Pasa, nguruba tonowen, tiina kat le ingal matadi. Eemoghon nguruba tonenen ineep ris, ve isob. *Igham 34:1+,28+; Hib 12:18+*

⁸ Ve ataam paghu to aazne tambees pa Maaron, nene vene: Maaron Avuvu igham uraat pait ve itoor ghiit tanim paghu. Tovenen ataam tonene nguruba ve tapiri tiina kat ilib pa ataam munjina. *Ro 7:6; Ga 3:2-5*

⁹ Ataam paghu, nene nguruba ve tapiri tiina kat ilib pa ataam munjina. Onoon, ataam munjina inim toman nguruba ve tapiri tiina. Eemoghon ataam tonowen isaav pait tovene: Iit pale tamaat pa sosor toit. Ve ataam paghu to aazne tataghoni, nene igham ghiit taneep denjaad ila Maaron mata. *Ezek 18:4; Ro 3:21+, 8:1+*

¹⁰ Onoon, ataam munjina inim toman nguruba ve tapiri tiina. Eemoghon ighaze taghazoon pa ataam paghu ngara, nene pale taghita taghaze ataam munjina, nguruba ve tapiri kat maau. Pasa, ataam paghu nguruba, nene tiina kat ilib pa ataam munjina.

¹¹ Sawa to Maaron ivotia ataam munjina to tutuun, nene inim toman nguruba ve tapiri. Eemoghon ataam tonowen irau ineep itaghoni gha ila ne maau. Pale isob. Ve ataam paghu tonene irau isob maau. Pale ineep tovene itaghoni taghoni gha ila. Tovenen ye nguruba ve tapiri tiina kat. *Ro 10:4; Hib 7:18, 8:13*

¹² Yei nighur ila ariana tovene, tauto

nimatughez maau, ve nisavsaav ghazooŋa pa tamtoghon. *Mbanj 4:13; Ep 6:19; Pil 1:20*

¹³ Yei ninimale Mose maau. Aghita. Muuŋ, ye iponpoon nagho pa uli pida. Leso yes Israela timbatut nagho to isul ne sob. Pasa, ŋguruba tonowen ineep mala maau. Ineep ris, ve isob. *Igham 34:33+*

¹⁴ Eemoghon yes Israela ŋgar todi iyaryaŋ, tauto tighilaal mbef tonowen pughu maau. Ve aazne paam, ighaze tiwaat saveeŋ to ataam muŋgina, yes tighilaal pughu maau. Nene inimale uli pida iponpoon matadi sone. Pasa, Kriŋi moghon to irau igham uli pida tonowen ighau padi. *Ro 11:7+,25; 2Kor 4:4*

¹⁵ Tauto muuŋ ve inim aazne, ighaze yes Israela tiwaat saveeŋ to Mose, yes tighilaal pughu maau. Nene inimale mbef eta iponpoon lolodi ve ŋgar todi.

¹⁶ Eemoghon ighaze tamtoghon eta itoor ŋgar toni, ve ighur ila to Tiina to it, nene pale Kriŋi igham mbef tonenen ighau pani.

¹⁷ Tiina to nasavia ne, nene Maaron Avuvu. Ighaze ye inepneep toman ghiit, ye pale ipas ghiit tavot pa samia tapiri. Leso tanim mbesooŋa sorok muul sob. *Yo 8:32,36; Ro 8:2,15; Ga 4:6+, 5:1*

¹⁸ Aazne, iit taghazooŋ pa Maaron. Mbef eta ipoon mataad muul maau. Pasa, iit tasob taghita Ngeu Tiina ŋguruba toman tapiri ve poia toni ila to Kriŋi. Ye ipatoon Ngeu Tiina nagho pait inimale taghita Ngeu Tiina anunu ila tiroon. Tovenen mataad ilala pani, ve Tiina to it Avuvu itortoor ghiit. Leso tagham nagho, ve anaad tapatoon ŋguruba toman tapiri ve poia toni pa tamtoghon.

Yo 1:14; Ro 8:29; 1Kor 15:49; 2Kor 4:6

4

Maaron igham ghazonja toni isul ila lolood

¹ Maaron lolo isamin ghei ve ireu sosor tiei, ve ighur uraat tonene inim nimamai itaghon tau poia toni. Tovenen patanjani naol to nimbadaad di ne, nene irau titatan ghei ve tigham ghei nipul uraat tiei tonene maau. *1Kor 15:10; 2Kor 3:6; 1Tim 1:12+*

² Ngar mayanjija naol to tamtoghon tighamgham di inimale yongaan, yei nighur murimai padi wa. Ngar to yei nighamghami ne, kaarom eta ineep ila lolo maau. Ve niwatoran Maaron aliña maau. Nisavia denja moghon. Pasa, yei niwatag: Maaron ighita uraat tiei. Tauto nivovotia saveen onoon moghon pa tamtoghon, ve nisaav kat padi. Leso tighilaal ila lolodi tighaze yei izamai pa uraat tonene. *2Kor 2:17, 5:11; 1Tes 2:3+*

³ Onoon, tamtoghon pida, nene inimale mbeb eta ipoon lolodi ve ngar todi. Tauto sawa to nivotia varu poia padi, tigham ngar pani maau. Tamtoghon tovene titaghon ataam to pale igham di tilaledi. *1Kor 1:18, 2:14*

⁴ Varu poia isavia Krisi nguruba toman tapiri ve poia toni. Ve ipaghazonjani ighaze ye ngeu to ipatoon katin Maaron nagho pait. Eemoghon yes to tighur ila maau, tighilaal ghazonja to varu poia maau. Pasa, Sadan to maaron kaarom to taan tonene, ye ipoon ngar todi wa. *Yo 1:14, 12:31, 14:9; Ep 2:2; Pil 2:6; Kol 1:15; Hib 1:3*

⁵ Sawa to nivotia mos, yei nisavsaav pa taumai maau. Nisavsaav pa tamtoghon nighaze: “Yesu

Krisi, ye Tiina toit. Ve yei mbesoonja tiam. Ye tau imbaan ghei ninim pa niuul gham.” *Mbanj 2:36; 1Kor 3:5; 2Kor 1:24*

⁶ Muunj kat, Maaron isaav ighaze: “Ghazoonja ivot ve isul ila ndoroom lolo!” Ve ye igham ghazoonja toni isul ila yei lolomai paam. Leso nighilaal nguruba toman tapiri ve poia toni to Krisi ipatoonja pait. *Mbnp 1:3; Mt 4:16; Yo 8:12; 1Pe 2:9*

Yes mbanjoonja tinimale uur to tigharaat di pa taan ve tighur mbaliinj popoia ila lolodi

⁷ Yei mbanjoonja ninimale uur to tigharaat di pa taan ve tighur mbaliinj popoia ila lolodi. Pasa, yei tamtoghon sorok to taan, ve tapirimai imbool. Eemoghon Maaron ighur ghazoonja toni ve tapiri ila lolomai, ve ighur uraat toni inim nimamai. Leso ipatoonj tapiri ila uraat tiei. Tapiri tonowen, tiina le tiina kat. *2Kor 3:5, 12:9*

⁸ Onoon, patañani naol naol tighamgham ghei. Eemoghon titatan ghei maau. Moghon moghon ataam ivoolvol payei. Eemoghon lolomai isami maau. Pasa, yei niwatag: Maaron pale igham ataam eta ivot payei. *2Kor 1:8, 7:5*

⁹ Tamtoghon tighurghur patañani payei. Eemoghon Maaron ipul ghei maau. Tirab matin ghei le nitap nizi taan. Eemoghon nimundig muul. *Ro 8:35+*

¹⁰ Sawa to nimbaad patañani, nene inimale nila toman Krisi pa mateen toni. Eemoghon ye ipapalot ghei ve niyoon ariana. Tauto nipatoonja nighaze ye ineep mata iyaryaar.

¹¹ Yei tamtoghon to taan moghon, ve muri pale nimaat. Ve sawa isob to nineep izi taan, ninep-neep ila buza mata. Pasa, yei nitaghon Yesu.

Eemoghon niyoon ariana pa badoon patanani. Gabuamai tonene ipatoon Yesu ighaze ye ineep mata iyaryaar.

¹² Tovenen moghon moghon ninepneep ila naal avo. Eemoghon niuluul gham pa agham nepoon poia ila to Maaron.

¹³ Maaron aliya to timbooda, isaav ighaze: “You naghur ila to Maaron, tauto nasavia.” Yei tovene paam, nighur ila to Maaron, ve nitaghon ghurla tiei. Tauto nisasavia varu poia pa tamtoghon.

¹⁴ Pasa, yei niwatag: Ngeu to ipamundigin Tiina toit Yesu pa mateen, muri pale ipamundigin ghei paam, raraate inimale igham pa Yesu. Ve ye pale igham ghiit tala tayoon ila mata, ve ivotia ghiit ighaze: “Aghita. Nene tamtoghon tiou.” *Ro 8:11; 1Kor 6:14; 1Tes 4:14*

¹⁵ Yei niyoon ariana pa badoon patanani tiei to naol ne, lesu niuul gham. Yei nighaze poia to Maaron iza to ival tiina, lesu lolodi poia pani ve tipait iza pa tapiri ve poia toni. *2Kor 1:6; Kol 1:24; 2Tim 2:10*

Paulus ighamgham ngar pa mbep to pale tineep le alok

¹⁶ Tovenen patanani naol to nimbadaad di ne, nene irau titatan ghei ve tigham ghei nipul uraat tiei ne maau. Onoon, anonamai ighaze isami. Eemoghon nene mbep to potla moghon. Ve lolomai, sawa isob Maaron ighamgham uraat payei, lesu itoor ghei ninim paghu. *Is 40:29+; Ep 3:16; Kol 3:10*

¹⁷ Patanani tiei to naol ne, yei nighita di nighaze nene mbep tiina maau. Nene rauraua moghon. Ve mala maau pale tisob. Eemoghon patanani naol

tonene pale iuul ghei, leso izamai tiina izi ndug sambam, ve nineep toman Maaron ila nguruba lolo le alok. Mbeb poia to pale ivot payei, nene ilib kat pa patañani tiei to naol. *Ro 8:17+; 1Pe 1:6+*

¹⁸ Tovenen mbeb to taghita di pa mataad ne, yei matamai ila padi maau. Matamai ilala pa mbeb to irau taghita di maau ve talooñ varudi moghon. Pasa, mbeb to taghita di pa mataad, pale tineep ris ve tisob. Ve mbeb to aazne iit irau taghita di maau, nene pale tineep le alok. *Ro 8:24; 2Kor 5:7; Hib 11:1*

5

Paulus ikausim ighaze ñeez o igham anoña paghu to ndug sambam

¹ Yei nighita anoñamai to taan tonene inimale dur sorok to anunumai ineep ilooñ ila. Ve yei niwatag: Ighaze tireu dur tonene, Maaron pale igham lemai ruum tau to ineep izi sambam. Ruum tonowen, tamtoghon tigharaata pa nimadi maau. Maaron tau igharaata. Ve ruum tonenen pale ineep le alok. *2Kor 4:7*

²⁻³ Tovenen aazne, yei nikausim ve nitañ nighaze: “Oyai, ñeez o nineep ila inamai paghu tonowen?” Inamai tonowen, nene anoñamai paghu to sambam. Sawa to nilooñ nila, nene inimale anunumai indudi pa nonogiña paghu. Leso nineep tinimai nginiña sob. *Ro 8:23*

⁴ Sawa to ninepneep ilooñ ila dur tiei to taan tonene, lolomai ipatañan ve nitañtan pa nepoon to ndug sambam. Eemoghon lolomai pa nipul anoñamai to taan tonene maau. Nighaze anoñamai to taan inepneep tovene, le malmalimai nilooñ

nila anonamai paghu to sambam to pale ineep le alok, inimale tandud ghiit pa nonogiinja paghu.*

Ro 8:11; 1Kor 15:53+

⁵Maaron ighur ghiit pa tagham nepoon tovene. Ve igham tau Avuvu pait, inim pughu pa mbeb naol to muri pale igham di pait. *2Kor 1:22; Ep 1:13+*

⁶Tauto sawa isob, yei nimatughez maau, ve niyoon ariana. Onoon sawa to nineep toman anonamai to taan, nineep sagan pa Tiina toit. Eemoghon yei niwatag: Muri pale nila nineep tomani. *Hib 11:13+*

⁷Aazne, taghita katin mbeb eta pa mataad sone. Nepoon toit to taan, nene tataghon ataam to ghurla. *1Kor 13:12; 2Kor 4:18; Hib 11:1*

⁸Nasaav muul. Yei nimatughez maau ve niyoon ariana. Ve lolomai pa nipul anonamai to taan tonene, ve nila nineep toman Tiina toit Yesu izi sambam. Pasa, nene mbeb poia kat ilib pa nepoon tiei to taan. *Pil 1:23*

⁹Tauto ighaze nineep sagan pa Tiina toit, ma nineep tomani izi ndug toni, nene yei nizuaria ghei nighaze nigham ngar to ye lolo pani. *Kol 1:10; 1Tes 4:1*

¹⁰Pasa muri, iit tasob pale tayoon ila Krisi mata. Leso ingabiiz ghiit, ve ighur atia pa iit enaena itaghon ngar to taghami izi taan. Ngar popoia, ve ngar samsamia paam. *Mt 25:31+; Mbarj 17:31; Ro 2:16; Syg 20:12*

Iit leed uraat pa tauul tamtoghon, lesu yesja

* **5:4:** Saveej waaro tonene ngara, tovene: Paulus lolo pa imaat, ve anunu moghon ila ndug sambam maau. Ye ighaze Krisi rikia imuul inim. Leso imaat sob. Igham anona paghu ve malmali ila ndug sambam.

Maaron tilup di tinim ee moghon

¹¹ Tovenen yei nimatughez pa Ngeu Tiina. Tauto nizuaria ghei nighaze le nigham tamtoghon titoor ngar todi ila pani. Lolomai toman ngar tiei, nene ineep ghazonja ila Maaron mata. Ve nighaze yam paam aghazonj payei, ve aghilaal ila lolomim aghaze yei nimbesmbees pa Maaron toman lolomai. *Mbo 139:1+; Hib 10:31; Jud 23*

¹² Yam agham ngar pa saveenj tiei tonene vena? Aghaze nipait taumai muul, leso aghur inim tiei aghaze yei izamai pa uraat tiei? Maau. Yei nisavia saveenj tonene, leso tinimim iza pa uraat to nighami, ve irau apamuul saveenj to ndiran pida to tineep toman gham. Ndiran tonanan, tighamgham ngar pa tamtoghon izadi ve tipakur di pa mbep to uliid moghon. Ve mbep to lolood, yes tigham ngar pani maau. *2Kor 1:14+*

¹³ Tamtoghon pida tighita ghei ninimale borouja, ve tighaze ngar tiei iwaghamgham. Ve pida tighaze ngar tiei denja. Nene poia. Taudi ve tisavsaav! Eemoghon uraat tiei tonene, nighamghami pa nipait Maaron iza ve niuul gham. *1Kor 1:18-25*

¹⁴ Ngar to Kresi to lolo pait kat, nene ighamgham pooz payei ve ipamundigin ghei pa ghamuunj uraat toni. Pasa, yei nighur ila nighaze ngeu ee moghon tonowen to igham tamtoghon tisob inadi, ve imaat pa sosor todi. Tauto yes to tila tomani pa mateenj toni, tisob tipul nepoonj todi munjina wa. *Ro 5:15, 6:11+; 1Tim 2:6*

¹⁵ Kresi imaat pa iit tasob, leso iit tamtoghon to taneep ila toni, tataghon ngar to tauud muul sob, ve tataghon ngar to ye lolo pani. Pasa, ye imaat pa

sosor toit ve imundig pa mateen, leso iuul ghiit. *Ro 14:7+; Ga 2:20; 1Pe 4:2*

¹⁶ Tovenen aazne, yei ningabiiz tamtoghon eta itaghon ngar to taan muul maau. Onoon, muun yei ningabiiz Krisi itaghon ngar to taan. Eemoghon aazne, nigham ngar tovene pani muul maau.

¹⁷ Ighaze tamtoghon eta inim Krisi le ve ineep ila toni, nene Maaron igham mbep paghu ivot. Ngar mungina to tamtoghon tonenen, nene isob, ve ye igham nepoon paghu. *Yo 3:3-7; Ro 6:4; Ga 6:15; Syg 21:4+*

¹⁸ Mbep tisob tonenen tivot ila to Maaron. Aghita. Muun, koi ineep ila itiņa Maaron sosood. Eemoghon ila uraat to Krisi, aazne itiņa Maaron talup ghiit tanim ee moghon wa. Ve ye ighur uraat inim nimamai ighaze niuul tamtoghon, leso yesņa Maaron tilup di tinim ee moghon. *Ro 5:10; Kol 1:20; 1Yo 2:2*

¹⁹ Muun, koi ineep ila iit tamtoghon ve Maaron sosood. Pasa, tamamalaan pa tutuun toni. Eemoghon ila uraat to Krisi, Maaron ireu sosor toit, ve ipasob koi tonowen. Tauto aazne, mata kisin sosor toit muul maau, ve itiņa talup ghiit tanim ee moghon wa. Ve ye ighur saveen toni inim tiei, leso nivotia pa tamtoghon, ve tiwatag ataam to yesņa Maaron tilup di tinim ee moghon. *Mbo 32:1+; Ro 3:23+; Kol 1:19+*

²⁰ Tovenen yei nigham Krisi nagho, ve Maaron ivovotia aliņa payam ila avomai. Ye nitan roran gham ila Krisi iza nighaze: “Atoor ngar tiam ila pa Maaron. Leso yamņa alup gham anim ee moghon.”

²¹ Aghita. Krisi, ye le sosor eta maau. Eemoghon

Maaron ighur sosor toit iza toni ve imaat inim watoonrau pa ireua. Leso iit to tanim Krisi le ve taneep ila toni ne, taneep denjaad ila Maaron mata. *Is 53:6+; Ro 5:19; Ga 3:13; Pil 3:9; 1Yo 3:5*

6

¹ Yeina Maaron niluplup ghei pa uraat toni. Tovenen nighaze nipalot gham tovene: Poia to Maaron to iza tiam, nene irau ipamundigin gham pa ataghon Maaron ngar toni. Leso poia toni tonanan anonja ivot. Ighaze maau, nene pale inim mbeb sorok. *2Kor 1:24, 5:20; Hib 12:15*

² Maaron aliņa isaav tovene:

“You taug naghur sawa pa naghham mulin gham ve naghham poian gham. Ve sawa kat tonenen, naloonj sunjuunj tiam, ve nauul gham.” *Is 49:8*

Aloonj. Sawa to Maaron igham mulin ghiit ve igham poian ghiit, tauto aazne taza pani wa. *Lu 4:18+; Hib 3:13*

Nepoonj to mbesoonja tau to Krisi

³ Mbesoonj tiei to nighamghami pa Krisi, yei nighaze nitaghon ngar to denja kat ila tamtoghon matadi. Lolomai pa nigham ngar eta isosor maau. Pa vene, nigham tamtoghon titap pa ghurla todi. *Ro 14:13; 1Kor 8:13, 10:32*

⁴ Ngar tiei isob, nene ipatoonj ghei ighaze yei mbesoonja to Maaron. Pasa, patanjani naol tighamgham ghei, eemoghon niyoon ariņņa pa badoonj di. Moghon moghon patanjani izaza tiei, ve sawa pida, nighita nighaze lemai ataam muul maau. *2Kor 4:9+*

⁵ Tamtoghon tiloslos ghei, ve tighurghur ghei niloon nila ruum to yabyabuun, ve nighamgham samia ila malmal. Yei nirab taumai pa uraat to Krisi le tapirimai isob kat. Ve sawa naol, nigheen pooi maau, ve pitool matmatin ghei.* *Mbanj 16:23; 2Kor 11:23+*

⁶ Yei nitaghon ngar ngalaanja moghon ila Maaron mata, ve nighazoon pa ngar toni, ve nighamgham poian tamtoghon. Ve ighaze tigham samin ghei, yei nitatan taumai ve nimbaada moghon. Avuvu Patabuan inepneep toman ghei, ve nighur lolomai pa tamtoghon kat. *Ro 12:9; 2Kor 4:2; Ga 5:22; Kol 3:12; 1Tim 4:12*

⁷ Yei nisasavia saveen onoon moghon, ve Maaron tapiri ipapalot ghei. Mbeb tiei to malmal, nene ngar to denja ila Maaron mata. Ngar tonene inim iiz pa niparab pani, ve inim sigeu pa nipoon taumai pani. *1Kor 2:4; 2Kor 10:4*

⁸ Sawa to nigham uraat to Maaron, tamtoghon pida tipait izamai, ve pida tiveleg ghei tighaze yei tamtoghon sorok. Tamtoghon pida tipait varumai, ve pida tiwaghamun izamai. Tamtoghon pida tighita ghei tighaze yei mbesoonja tau to Maaron, ve pida tighaze yei nigham kaarom ve nipaghau tamtoghon pa ataam to Maaron.

⁹ Tamtoghon pida tighazoon payei, ve pida tikankaan payei. Sawa pida, nigham ngar nighaze paam nimaat. Eemoghon nimaat maau. Patanjani pida to tivot payei, nene pa ipasalunghan ghei.

* **6:5:** Ataam ite to tator saveen waaro tonene, nene vene: "Sawa naol, yei nigheen pooi maau. Nipamaat ve ningun taumai pa ghaniinj aniij, leso matamai ingal sunjuunj."

Eemoghon irab ghei nimaat maau. *Mbo 118:18; 2Kor 4:9+*

¹⁰ Onoon, patanjani naol to nimbadaad di ne, tigham ghei lolomai ipatanjan. Eemoghon Maaron igham ghei lolomai poia irau sawa isob. Yei ndiran mbolaana. Eemoghon niuluul ival tiina le tiraua kat pa mbeb popoia to Maaron. Yei lemai mbeb eta maau. Eemoghon nirau mbeb to naol. *2Kor 7:4, 8:9; Pil 2:17*

Paulus ivotia lolo pa yes Korin

¹¹⁻¹² O yam Korin, yei lolomai payam kat, tauto nisavia saveen naol tonene payam. Leso awatag katin lolomai. Eemoghon nighita nighaze yam aponpoon lolomim payei sone.

¹³ You nasaav payam inimale ndinatug yam: Apon lolomim payei muul malep. Aghur lolomim payei, inimale yei nighur lolomai payam. *1Kor 4:14*

Taghur muriid pa ngar samsamia

¹⁴ Aloon. Yes to tighur ila to Krisi maau ne, yam ala toman di pa ngar todi malep. Pasa, ngar todi inimale yam maau. Yes to titaghon ngar denja ve yes to timalaan pa Maaron tutuun toni, pale tilup di pa uraat vena? Ghazonja ve ndoroom irau tilup di? Maau. *1Kor 5:9+; Ep 5:6+,11; 1Yo 1:5+*

¹⁵ Ma Krisi yesuru Sadan† tigham ngar raraate? Ighaze tamtoghon eez ighur ila to Krisi, ve ite ighur ila maau, sa mbeb irau ilup yesuru? Maau. *1Kor 10:20+*

¹⁶ Yam awatag: Iit tanim Maaron mata yaryaara rumai toni. Vena, irau talup rumai toni toman

† **6:15:** Paulus imbood Belial (o Beliar). Belial, nene Sadan iza ite.

rumai to maaron kaaromnja? Maau. Saveenja, Maaron isavia pataghaan wa. Ighaze:

“You pale naneep toman di, ve nalaghlaagh ila lolodi.

Ve you pale nanim Maaron todi, ve yes tinim tamtoghon tiou.” *Wkp 26:12; Ezek 37:27; 1Kor 3:16; Syg 21:3*

¹⁷ Tauto Maaron isaav muul ighaze:

“Apul ndiran samsamiadi tonanan tineep, ve ala aneep sagan padi.

Ve mbeb to ighaze ingalaan maau, yam agharaui malep.

Leso naghham gham toman lolog poia. *Wkp 5:2; Is 52:11; Syg 18:4*

¹⁸ ve nanim tamamim, ve yam anim ndinatug ve ndinatug liva.

Saveen tonene, nene Maaron ariana tau aliña.” *Ro 8:14; Syg 21:7*

7

¹ Yam ndiran tiei, lolomai payam kat. Aghita. Maaron igham leed saveen mbuaan popoia naol tonene. Tovenen ngar tisob to tiwaghamun anonjaad ma anunuud, ve tigham ghiit tasami ila Maaron mata, tapul di tineepledi. Ve tamatughez pa Maaron, ve taghur tauud tanim ye le kat, ve tataghon ngar patabuan moghon inimale ye tau itaghooni. *1Tes 4:7; Hib 10:22; 1Pe 1:15; 1Yo 3:3*

Paulus lolo poia kat pasa, yes Korin titoor ngar todi wa

² Yam tonvetaz, apoon lolomim payei muul malep. Akaak lolomim payei lak! Pasa, yei nigham sosor pa tamtoghon eta, ma niwaghamun

tamtoghon eta, ma nigham kaarom pa niyub mbeb to tamtoghon eta, ne maau. *Mbanj 20:33; 2Kor 6:12+, 12:17*

³ Saveeņ tiou tonene, you nasavia pa nasees matamim maau. Naghaze napasaluņgan gham moghon. You nasaav payam wa. Lolomai ineep tiam kat. Tovenen ighaze tanepneep, ma tamaat, nene mbeb eta irau irab motin lupuuņ toit maau.

⁴ You nasaav ghazonņa payam. Lolog ru payam maau. You naghita gham naghaze yam araua kat. Tauto agham ghou tinig iza. Onoon, pataņani naol tighamgham ghei. Eemoghon ņgar to yam aghami, tauto ipalot ghou, ve igham ghou lolog poia le poia kat.

⁵ Sawa to nila nivot taan suruvu to Masedonia, yei irau atemai izi rita maau. Pasa, pataņani naol tiņarua ghei. Yeiņa tamtoghon niwazoran ghei. Ve nigham ņgar naol ila lolomai, ve matughezaaņ tiina igham ghei. *Mbanj 20:1*

⁶ Eemoghon Maaron toit, ye Ngeu to palotiņ yes to pataņani itatan di. Tauto igham Titus inim peria tiei izi Masedonia, leso ipalot ghei ve irab atemai. *2Kor 1:3+, 2:13*

⁷ Ve tonene moghon maau. Mbeb ite to ipalot ghei, nene vene: Sawa to Titus inim, ye ipaesia varumim payei ighaze sawa to ilat peria tiam, yam apaloti ve arab ate. Ve ipaes payei ighaze lolomim ipataņan kat pa pataņani to muuņ ivot ila sosood, ve akausim aghaze le aghita ghou muul, ve ņgar tiam iyaryaaņ kat aghaze anim toman ghou pa ņgar tiou. Saveeņ toni tonowen igham ghou lolog poia le poia kat.

⁸ You nawatag: Rau to nambooda ilat tiam,

avaat igham gham lolomim isami ris. Eemoghon lolog ipatañan pa mbeb tonenen maau. Onoon, muunj lolog ipatañan pani. Ve aazne maau. Pasa, naghita lolomim ipatañan rismoghon, ve isob. *2Kor 2:4*

⁹ Tauto aazne lolog poia. Eemoghon lolog poia pa lolomim to ipatañan ne maau. Lolog poia pasa, sawa to lolomim ipatañan, yam atoor ñgar tiam. Ngar to lolood ipatañan pa sosor toit ve tator ñgar toit, nene itaghon Maaron ñgar toni. Tauto rau tiei tonanan iwaghamun gham maau.

¹⁰ Ighaze lolood ipatañan itaghon Maaron ñgar toni, nene igham ghiit tator lolood, lesu Maaron igham mulin ghiit. Ngar tovene, sei irau lolo ipatañan pani? Maau. Eemoghon ighaze lolood ipatañan inimale yes to titaghon ñgar to taan, nene pale ighereb ghiit pa mateen. *Mbo 38:18; Lu 18:13+*

¹¹ Aghita. Sawa to agham rau tiou ve lolomim ipatañan itaghon Maaron ñgar toni, yam irau asañan maau. Rikia moghon ve agharaat taumim. Pasa, ñgar tiam iyaryaan aghaze apaghazonan taumim, lesu you nawatag: Patañani to ivot, yam aneep ila maau. Yam amatughez pa Maaron, ve aghaze ataghon katin ñgar toni. Tauto aghur atia pa ñgeu to igham sosor. Ve aazne, akausim aghaze le aghita ghou muul. Ngar tiam isob tonanan ipatoon gham ighaze patañani to ivot, nene yam sosor tiam maau.

¹² Sawa to nambood rau tonanan payam, you naghama ñgar tiina pa ñgeu to igham sosor, ma

tamtoghon to ye igham sosor pani ne maau.*
 You naghaze yam apaghazonan taumim ila Maaron mata aghaze yam lolomim ineep tiei, ve anim toman ghei pa ngar tiei. Tauto nambood rau tonanan.

¹³ Tovenen ngar to yam aghami, nene ipalot ghei, ve irab atemai. Ve mbeb ite. Titus ipaes payei ighaze ye lolo poia kat pasa, sawa to ye ilat, yam asob aghami toman lolomim poia. Tauto ate izi, ve igham ngar naol muul maau. Ngar tiam tonanan ipalot ghei paam, ve igham lolomai poia kat.

¹⁴ Muun, you nasavia varumim pa Titus ve napait gham pa ngar tiam. Saveen tiou tonowen igham ghou mayag maau. Pasa, alinamai to nisavia pani pa nipait gham, nene onoon. Ye tau ighita wa. Tovenen saveen tiei tonowen onoon, raraate inimale saveen isob to yei niasavia payam nene onoon moghon.

¹⁵ Titus paam lolo payam kat. Pasa, mata ingal sawa to ye ilat tiam. Yam atandag pani ve aghami toman lolomim poia, ve yam asob aloon aliya. Pasa, amatughez pa Maaron ve aghaze ataghon ngar toni. *2Kor 2:9*

¹⁶ Tovenen aazne, you lolog poia kat. Pasa, you naghur ila ariana naghaze yam pale ataghon katin Maaron ngar toni.

8

Paulus ipalot yes Korin ighaze tiuul tamtoghon to Krisi to tineep izi Yerusalem ve mbolaan igham di

* **7:12:** Mos waaro tonene, Paulus isavia ngeu eez to muun izoor aliya ve igham sosor. Eemoghon ye lolo pa iwaat ngeu tonowen iza ivot ighazon maau.

¹ Yam tonvetaz, yei nighaze yam awatag: Poia to Maaron ipamundigin lupuun to Krisi to tineep izi taan suruvu to Masedonia, ve tigham ngar poia kat. *Ro 15:26+*

² Onoon, yes tineep ila patanani tiina lolo, ve mbolaan igham di le tineep sami kat. Eemoghon tingoog yaam tiina kat pa tiuul tamtoghon to Krisi to tineep sami izi Yerusalem. Ngar todi tonowen, tighami toman lolodi poia. Pasa, yes matadi rein mbeb. *Mk 12:44; Ro 12:8*

³ Taug naghita ngar todi wa. Tovenen naghaze napaes payam: Yaam to tingooga pa ulaan, nene tiina kat. Tighur yaam to yes irau tighuri, ve tighur pida paam izala pogho. Taudi lolodi tighaze tigham tovene.

⁴ Pasa, ngar todi iyaryaan kat tighaze yes paam tighur nimadi pa ulaan Maaron tamtoghon toni to mbolaan igham di. Tauto tinoknok ghasoniin ghei le niyok padi. *Mban 11:29; 2Kor 9:1+*

⁵ Yei nighaze pa tigham ngar tonenen moghon. Eemoghon maau. Yes tighur taudi toman lolodi isob ila pa Tiina toit muun, ve tighur taudi payei paam, titaghon Maaron lolo.

⁶ Uraat to ulaan tonene, poia to Maaron inim pughu pani, ve Titus ipamundigini ila lolomim wa. Tauto yei nisaav pani nighaze ipalot gham pani le apasobi kat.

⁷ Maaron Avuvu irei tapiri toman uraat ve ngar naol payam le araua kat. Yam aghur ila ariana, avovotia Maaron aliya pa tamtoghon, aghazoon pa ngar toni, ve tinimim imbees pa uraat toni. Ve uraat to nighami ila lolomim, nene ipamundigin gham, tauto lolomim pa Maaron ve tamtoghon

paam. Uraat to ulaan tamtoghon, nene ngar ite to poia to Maaron ipamundigin ghiit pani. Tovenen yam araua paam, ve matamim rein, ghero poia. *1Kor 1:5, 16:1+*

⁸ Alinag tonene, nasavia inim tutuun payam maau. You naghaze natoov gham, lesu naghita: Yam aghur lolomim pa Maaron ve tamtoghon kat, animale yes pida to tinidi imbees pa uraat tonene, ma maau?

⁹ Poia to Tiina toit Yesu Krisi, yam awatagi wa. Muun, ye irau mbeb to naol. Eemoghon ipul mbeb toni tonowen tisob tizi tineep, ve izi inim taan, ve ineep inimale ngeu mbolaanja, lesu iuul gham ve igham gham araua kat pa mbeb to Maaron. *Mt 8:20; Pil 2:6+*

¹⁰ Tovenen you naghita naghaze: Yam apasob uraat tonene le isob kat, ghero poia. Ndaman to ila wa, lolomim ipazaagh gham pa uraat to ulaan tonene, ve yam apamundigini muun, ghero lupuun pida titaghon gham.

¹¹ Uraat to ulaan to lolomim ipamundigin gham pani, yam irau tinimim imbees pani, ve agham uraata le apasobi kat. Aghur irau to aghuri. Ighaze lemim yaam tiina, aghur tiina. Ighaze lemim tiina maau, aghur ngiira.

¹² Pasa ighaze iit leed mbeb eta, ve lolood taghaze tagham pa Maaron, ye pale lolo poia pani. Ve ighaze leed mbeb maau, nene poia. Maaron irau ighur mata pait pa tagham mbeb tovene pani ne maau. *Mk 12:43; 2Kor 9:7; 1Pe 4:10*

¹³ Saveen tiou tonene, ngara tovene: You naghaze yam auul tamtoghon pida tineep pooi, ve

taumim aneep sami ne maau. Naghaze yam asob aneep raratemim.

¹⁴ Aazne, yam arau mbeb naol. Tovenen yam irau auul di pa mbolaan todi. Ve muri, ighaze yes tirau mbeb pida to yam ambool padi, nene pale anadi tiuul gham. Leso yam asob aneep raratemim. *2Kor 9:12+*

¹⁵ Yam irau ataghon ngar to muun ivot pa yes Israela, indeen sawa to tiyou aniin manna. Saveenja timbooda pataghaan tovene:

“Yes to tiyou tiina, tighan le tipasobi kat. Avodi muri rita izi maau. Ve yes to tiyou ngiira moghon, tovene paam. Timbool maau. Tighan le apodi isun.” *Igham 16:18*

Paulus imbaan ndiran tol pa tiuul yes Korin

¹⁶ You napait Maaron toman lolog poia. Pasa, ye igham Titus ighur lolo payam kat. Tauto ye ighaze iuul gham raraate inimale yei nighaze niuul gham.

¹⁷ Sawa to yei nighasoni pa ilat ighita gham, ye iyok pa alinamai. Ve tau lolo ighaze ilat ighita gham paam. Pasa, ye ighur lolo payam kat ve ighaze iuul gham.

¹⁸ Ve yei pale nimbaan tonvetaz toit ite lesu yesuru Titus tilat. Ngeu tonene, lupuun to Maaron tisob tipait iza pa uraat toni to votiaan varu poia.

¹⁹ Ve tonene moghon maau. Lupuun to Krisi tighuri lesu yein nilaagh pa uraat tonene. Uraat to ulaan tonene, poia to Maaron ipamundigini ila lolood. Ve yei nighaze nighami pa nipait Tiina toit iza, ve nipatoon taumai nighaze yei tinimai imbees pa uraat to ulaan Maaron tamtoghon toni.

²⁰⁻²¹ Yei niwatag: Tamtoghon pale tighur yaam tiina pa tiuul yes tonvetaz toit to mbolaan igham di ne. Tovenen nighaze ningin poian yaam to nighami, ve nigham ngar to denja moghon ila Tiina toit mata ve tamtoghon matadi paam. Leso tamtoghon tiyou avodi payei sob. *Ro 12:17+; 2Kor 6:3; 1Pe 2:12*

²² Ve yei pale nimbaan tonvetaz toit ite paam ilat toman ndiran ru tonowen, lesu yes tol tilat tiam. Ngeu tonene, yei nighur uraat naol naol ila nima, ve nighita nighaze tini imbesmbees pa uraat to Maaron. Ye ighur ilat tiam ariana ighaze yam aghur lolomim pa uraat tonene kat, tauto ighaze iuul gham.

²³ Tovenen Titus, yam awatagi wa. Pasa, yeru niluplup ghei pa uraat to nighami ila lolomim. Ve tonvetaz toit ru to nasavia di payam ne, yesuru tigham lupuan to Krisi nagho ve tilat. Uraat todi toman ngar to tighamghami, nene ipait Krisi iza, ve ipatoon tapiri ve poia toni.

²⁴ Tovenen sawa to yes tol tilat peria tiam, yam agham di ve apatoon ngar poia padi. Leso tiwatag tighaze yam lolomim padi, ve lupuan tisob to Krisi tiwatag tighaze saveen to muun nisavia pa nipait varumim, nene onoon.

9

Paulus ipalot tamtoghon to Akaia, lesu yes paam tinjoog yaam pa yes Yerusalema

¹⁻² Yo, yam to aneep izi taan suruvu to Akaia, irau nambood saveen mala payam maau. Pasa, you nawatag: Ngar tiam iyaryaan aghaze auul Maaron tamtoghon toni to mbolaan igham di.

Nene inim mbesoon tiam ila pa Maaron. Moghon moghon, you napapait varumim pa nditaad to Masedonia. Pasa, ndaman to ila wa, yam angoog yaam ve aghuri isaan. Ngar tiam iyaryaan kat aghaze agham uraat to ulaan tonene, tauto ipamundigin ival tiina to Masedonia paam.

³ Tovenen yei nipait varumim ve nisaav padi nighaze yam angoog yaam wa. Pughu tonene to naghaze nambaan Titus toman tonvetaz toit ru to nasavia di ne timuun tilat, leso tiuul gham pa uraat tonene. Pa vene, saveen tiei to nisavia inim paitoon gham inim mbeb sorok.

⁴ You naghur ila ariana naghaze yam pale agharaat mbeb inim nimamim ve isaan. Eemoghon ighaze yeina tamtoghon pida to Masedonia nilat, ve tighita gham agharaat mbeb sone, nene pale mayag pa alinag to nasavia pa napait gham, ve yam paam pale mayamim.

⁵ Matag ingal tovene, tauto naghaze nambaan tonvetaz toit tol tonenen timuun tilat. Leso yamna agharaat yaam to angooga itaghon saveen mbuaan tiam, ve isaan pataghaan. Yaam tonanan pale ipatoon poia to Maaron pa tamtoghon toni. You lolog pa nalat nazoornug payam ve aghur mbeb ne maau. Naghaze agham mbeb tiina toman lolomim.

⁶ Matamim ingal: Ighaze tamtoghon eta ivazog aniin ngiira, nene pale sawa to taitain, ye pale ighita anona ris moghon. Ve tamtoghon to ighaze ivazog aniin katindi, nene pale ighita anona katindi.

Lu 6:38; Ga 6:7+

⁷ Yaam piiz to tamtoghon enaena lolodi ighur pani tighaze tighuri, nene poia. Tighuri moghon.

Eemoghon ighaze yam anguruut mbeb tiam, ve tizoorndug payam ila ila le aghuri, nene poia maau. Pasa, Maaron lolo pa yes to tireirei mbeb todi toman lolodi poia.

⁸ Maaron, ye irau ighur poia toni tiina iza tiam ila ataam naol naol. Leso yam araua kat pa mbeb tisob irau sawa isob, ve irau agham uraat popoiadi to naol ne. *Np 28:27; Pil 4:19*

⁹ Saveeja timbooda pataghaan wa. Ighaze:

“Ngeu poia, ye ireirei mbeb toni pa yes mbo-laaja.

Tamtoghon tovene, ngar toni denja pale ineep ariana itaghoni taghoni gha ila.” *Mbo 112:9*

¹⁰ Yes to tivavazog aniin, Maaron igham ledi aniin uve. Ve ye igham aniin pa iit tasob. Ye pale igham mbeb tiam tivot katindi, lesa arei katindi tila pa yes mbolaaja. Ngar tovene, nene denja ila ye mata, ve ighur anona popoiadi naol.

¹¹ Tovenen Maaron pale igham gham araua kat pa mbeb tisob. Leso yam irau agham ulaan pa tamtoghon irau sawa isob. Ve sawa to yei nigham mbeb tiam ila peria to yes to mbolaan igham di, yes pale lolodi poia pa Maaron, ve tipaiti pa ulaan to yam agham padi.

¹² Uraat tonene, yam aghami inim mbesoon tiam ila pa Maaron. Ulaan tiam pale ipasob mbo-laan to tamtoghon toni. Ve tonene moghon maau. Pale igham ival tiina lolodi poia pa Maaron, ve tipaiti kat pa poia toni paam. *2Kor 4:15, 8:14*

¹³ Ngar tiam to aghaze arei mbeb tiam, ve asangoor ulaan pida ila pa yes mbolaaja, nene ipatoon gham ighaze yam aghur ila varu poia to Krisi, ve ataghon aliija. Tovenen tamtoghon to tigham

ulaan ilat tiam, pale tipait Maaron iza pa tapiri ve poia toni.

¹⁴ Ve lolodi ineep tiam, ve matadi ingal gham ila sunuunj todi. Pasa, tighita poia tiina to Maaron ineep tiam.

¹⁵ Iit lolood poia pa Maaron ve tapaiti! Pasa, ye igham leed mbep to poia le poia kat. Ighaze tasavia mbep tonowen, pale tasaav vena? Pasa, saveen eta iraua maau. *Yo 3:16; 1Pe 1:8-9*

10

Paulus ipamuul saveen ngaliin to tamtoghon pida

¹ Tamtoghon pida tingalngal saveen payou tighaze sawa to naneep toman gham, you namatughez ve nasasavia saveen popoia moghon payam. Ve ighaze naneep sagan payam, nene napakur taug ve avog iyaryaan payam. Tovenen you Paulus naghaze napalot gham pa saveen pida. Saveen to naghaze nasavia, nene nasavia toman ngar luuma ve ngar to natatan taug inimale Krisi itaghoni. *Mt 11:29; 1Kor 2:3; Pil 2:5+*

² You nawatag: Ndiran tonowen tighaze yei nitaghon Maaron ngar toni maau. Tighaze nitaghon ngar to tamtoghon moghon. Yes irau tipatum di. Pasa ighaze nilat, nene irau namatughez padi maau. Pale nayaan di toman saveen ariana. Eemoghon lolog pa naghham ngar tovene maau. Tovenen nataj roran gham naghaze agharaat ngar tiam. *1Kor 4:21*

³ Onoon, aazne yei nineep izi taan. Eemoghon ni-parab ninimale yes to titaghon ngar to taan maau.

⁴ Pasa, ndaab to malmal to yei niparab pani, nene to taan maau. Nene ndaab to Maaron igham payei, ve ye tau tapiri ineep ila. Tauto ruum arianaadi to koiamai tiyonjooŋ ila lolodi, nene yei irau nireu mbirisan di tizi. *2Kor 6:7; Ep 6:13+;*

1Tim 1:18

⁵ Ndiran pida tipapait taudi pa ngar todi, ve avodi iyaryaan pa ngar kaarom naol to iponpooŋ ataam pa yes to tighaze tiwatag Maaron. Ndiran tovene, yei nireureu ngar ve saveeŋ kaarom todi isob. Ve nitatan ngar todi samsamia, ve nigham ngar todi isob imuul ila pa Kriŋi. Leso titaghon ngar toni, ve tineep ila samba. *1Kor 1:19*

⁶ Yei nighur matamai ilat tiam moghon. Ighaze yam alooŋ aliŋamai ve ataghon saveeŋ tiei, nene yei pale nighur atia pa tamtoghon tisob to tizor-zoor saveeŋ.

⁷ Alooŋ. Yam angabiiz mbep to potla moghon malep. Angabiiz poian lolo toni paam. Ighaze tamtoghon eta igham ngar ighaze ye to Kriŋi, pale iwatag ighaze yei paam to Kriŋi, ve Kriŋi tau to ighur ghei pa uraat toni. *Yo 7:24; 2Kor 11:23; 1Yo 4:6*

⁸ Onoon, saveeŋ tiou tonene, nene inimale napait izamai pa uraat to nighamghami Eemoghon mayag maau. Pasa, yei izamai pa uraat tonene. Tiina toit ighur ghei pa uraat tonene pa niwaghamaŋ gham maau. Ye ighaze nipalot gham. *2Kor 13:10*

⁹ Tovenen agham ngar aghaze rau to nambood di tilat tiam, nene pa napamatughezan gham malep.

¹⁰ Ndiran to nasavia di ne, tisavia ghou tighaze: “Saveeŋ to ye imbooda ila rau, nene ariana ve

toman tapiri. Eemoghon ighaze tau inim peria, nene taghita taghaze ye le tapiri maau, ve iwaghamgham pa savsaveen. Saveen toni anona maau.”

¹¹ Ndiran tonenen irau tigham ngar pooi. Pasa, saveen to nineep sagan ve nimbooda payam, ighaze nilat ve itinja taneep, nene pale nitaghon saveen tonowen ngara. *2Kor 13:2*

Paulus ighaze ye le iza pa igham uraat izi Korin

¹² Yei ninimale ndiran pida maau. Yes tilib payei kat. Pasa, ngar to tighamghami, yei irau nighami maau. Yei mayamai pa nipait taumai izamai. Eemoghon yes mayadi pa tigham ngar tovene maau. Tighaze yes tirau kat. Pasa, sawa to tingabiiz taudi, tigham ngar pa Maaron alinja maau. Tingabiiz taudi toman nditadi ngar todi. Ndiran tovene, ledi ngar maau. *Lu 18:9-14*

¹³ Yei irau nipait taumai sorok ninimale ndiran tonenen maau. Ighaze nipait taumai, nene nisavia uraat to nighami izi ndug to Maaron ighuri payei. Ndug tonenen, yam Korin aneep ila paam. Ve ndug to ighaze lemai izamai pa nigham uraat pani maau, nene irau nimalaan ve nila nigham uraat tonowe maau. *Ro 12:3, 15:18*

¹⁴ Ndug to Maaron ighuri payei pa nigham uraat pani, yei nimalaan pani maau. Yam Korin aneep iloon ila paam. Ve yei to nilat ve nivotia varu poia to Krisi payam muun. Tovenen yei izamai pa nigham uraat ila lolomim. *1Kor 3:5*

¹⁵ Yei nipait ghei pa uraat to tamtoghon pida tighami ne maau. Uraat to taumai nighami izi ndug to Maaron ighuri payei pa nigham

uraat pani, ghoru nipait ghei pani. Uraat to nighamghami ila lolomim pa nipalot ghurla tiam, yei nighaze ivot inim tiina.

¹⁶ Leso inim ataam payei pa nivotia varu poia izi ndug pida to tineep ndug tiam dige ve ila. Pasa, lolomai pa nipait ghei pa uraat to tamtoghon ite ighami ne maau. Nighaze le nila ndug to tamtoghon tigham uraat padi sone, ghoru poia. *Ro 15:20*

¹⁷ Maaron aliņa isaav tovene:

“Tamtoghon to lolo pa ngar to pakuruun, ye irau ipakur Ngeu Tiina pa ngar to ye ighami.”
Yer 9:23+; 1Kor 1:31

¹⁸ Ighaze tamtoghon eta ipait tau, nene takankaan: Maaron lolo poia pani, ma maau? Ve ighaze Maaron tau ipait tamtoghon eta, nene tawatag taghaze ye lolo poia pani. *Ro 2:29; 1Kor 4:4+*

11

Paulus iveivei pa yes Korin pa mbanõõņa kaaromņa

¹ You naghaze naghama ngar to borouņa ris. Vena, irau ayok payou?

² Aghita. You nasia gham pa Krisi wa. Tovenen ngar tiou iyaryaan naghaze le ngar tiam isob ingalaan moghon, ve naghur gham ala toni, animale liva paghu to tighuri ila to tamoot, lesu yesuru tivai. Pasa, Maaron ngar toni iyaryaan ighaze tamtoghon toni tighur lolodi ve ngar todi isob ila pani moghon. *Ep 5:27; Kol 1:28; Syg 14:4*

³ Aazne, yam ataghon ngar ngalaanņa ve aghur lolomim isob inarua Krisi. Eemoghon

namatughez: Pale tamtoghon pida tighamun ngar tiam, inimale muun moot igham kaarom pa Eva ve itombaana, ghoru apul ngar tonanan. *Mbnp 3:1+; 2Pe 3:17*

⁴ Pasa, you nawatag: Tamtoghon pida tilat ti-neep toman gham, ve saveen to tivovotia pa Yesu, nene raraate inimale saveen to muun yei nisavia payam ne maau. Ve avuvu to yes tighaze yam aghami, nene raraate inimale Maaron Avuvu to muun aghami ne maau. Ve varu poia to tivovotia payam ne paam, nene raraate inimale varu poia to yei nisavia payam ve aghur ila ne maau. Eemoghon yam agham di toman lolomim poia, ve apul di tigham uraat todi tonanan, ve aghur ila saveen todi. *Ga 1:6+*

⁵ Aloon. Mbanoonpa pida to yam aghita di aghaze izadi tintina, yes tilib payou maau. Sa ngar to yes tighami, you naghami paam. *1Kor 15:10; 2Kor 12:11; Ga 2:6+*

⁶ Onoon, you ngeu to savsaveen nanimale yes maau. Eemoghon ngar to Maaron, you nambool pani maau. Sawa naol, ngar naol to naghams di ne, tipatoon ghou ila matamim tighaze you naghazon pa Maaron ngar toni. *1Kor 1:17, 2:1,13; Ep 3:4*

⁷ Yam awatag: Sawa to navotia varu poia to Maaron payam, natatan taug, ve naghams uraat payam sorok. Nayok pa agham leg atia maau. You nataghon ataam tovene pa napakur gham. Laak, yam aghita vena? You nasosor? *1Kor 9:12+*

⁸ Sawa tonenen, you naneep ila lupuun pida to Krisi nimadi. Ulaan to tigham payou, nene iuul ghou ve naghams uraat payam. Ngar tonenen,

nene inimale you nayub mbeb todi, lesu naghams payam.

⁹ Sawa to itinja tanepneep ve mbolaan igham ghou, you naghason gham pa ulaan eta maau. Pasa, tonvetaz pida to Masedonia tinim, ve tiuul ghou pa mbeb to nambool pani. Ve lolog pa naghams patañani eta payam maau. Tauto nayai ghou, ve naghason gham pa ulaan eta maau. Ve aazne ve itaghoni ila paam, pale nataghon ngar raraate moghon. *2Kor 12:13; Pil 4:15+; 1Tes 2:9*

¹⁰ Aloon. Saveen onoon to Krisi ineep tiou, ve ye tau ighita ghou ve nasavia saveen tonene. Yam tamtoghon to Akaia, tiam eta irau igham ghou napul ataam to nataghoni pa uraat tiou ne maau. Pasa, ataam tonene to igham ghou tinig iza ve napakur ghou pani.

¹¹ Vena, yam aghaze you lolog payam maau, tauto nataghon ataam tovene? Maaron iwatag: You lolog payam kat.

¹² Tovenen irau nayok payam pa auul ghou ne maau. Ataam to nataghoni pa uraat tiou, nene pale inepneep tovene. Pasa, naghaze napoon ataam pa yes to tipapait taudi izadi tighaze yes raratedi tinimale yei.

Ngar to mbanjoona kaaromña tighamghami

¹³ Ndiran tonowen, tigham taudi tinimale mbanjoona to Krisi. Eemoghon yes mbanjoona to Krisi maau! Tigham kaarom. *Mt 7:15+; Mbanj 20:29+; 2Kor 2:17*

¹⁴ Ve iit irau runjaad iza pa kaarom todi tonowen maau. Pasa, Sadan paam irau igham tau inimale

anġela to ipatoonġ ghazoonġa to Maaron, leso ito-
mbaan ghiit. *Ga*

1:8

¹⁵ Tovenen mbesoonġa toni paam, irau tigham
taudi tinimale ndiran to titaghon nġar denġa.
Eemoghon ruġaad iza padi malep. Muri, Maaron
pale ighur atia inġarua di pa nġar todi.

*Pataġani naol to Paulus imbaad di, tauto tipa-
toonġa tighaze ye mbanġoonġa to Krisi*

¹⁶ You nasaav wa. Naghaze nasavia saveeġ ris
inimale borouġa. Eemoghon tiam eta ighita ghou
nanimale borou malep. Ve ighaze aghita ghou
nanimale borou, nene poia! Apul ghou ve nagh
nġar to borouġa, ve napait taug izag ris.

¹⁷ You nawatag: Saveeġ to naghaze nasavia pa
napait taug, nene itaghon nġar to Tiina toit maau.
Saveeġ to naghaze nasavia, nene inimale saveeġ
to yes borouġa to ledi nġar maau.

¹⁸ Ve tambaġa. Pasa, tamtoghon katindi to
yamġa anepneep, yes titaghon nġar to taan ve
tipapait taudi izadi. Tovenen you paam, anag
naghaze napait taug.

¹⁹ Aa yam Korin, yam araua kat pa nġar! Tauto
yes to ledi nġar maau tinimale borouġa, yam
lolomim poia padi, ve lolomim pa lonġaanġ saveeġ
todi!

²⁰ Ve tonene moghon maau. Pasa, ighaze tam-
toghon eta itatan gham ve izoorndug payam pa
ataghon nġar toni moghon, ma iyou mbeb tiam
tisob tinim le, ma igham mbeb tiam dige ee
moghon, ma ipait tau, ma ipambar gham ve ipa-
mayanġin gham, yam ayok pani moghon, ve apuli
ighamgham tovene.

²¹ Ndiran tonanan tilib payei kat! Tigham ghei mayamai. Pasa, ngar to tighamghami, yei irau nitaghoni maau.

Yo, naghaze naseen saveen tiou borou tonene. Pasa, ndiran pida to tineep toman gham, mayadi maau ve tipapait taudi izadi. Tovenen you pale nataghon ngar todi ve napait taug izag paam! *2Kor 10:10*

²² Vena, ndiran tonanan yes Hibrua? You paam to Hibu. Ve yes to Israel? You paam to Israel. Ve yes tivot ila to Abaram? You paam navot ila to Abaram.*

Mbanj 22:3; Ro 11:1; Pil 3:4+

²³ Ve yes mbesoonja to Kresi? You paam, mbesoonja toni. Eemoghon you nalib padi. Alinag tonene, you nawatag, nene saveen to borouja. Eemoghon tambanja! You narab taug pa uraat to Kresi le nalib padi. Ve tilos ghou le nasami pae katindi. Sawa naol, tighur ghou naloon nala ruum to yabyabuun. Ve moghon moghon, naghita naghaze sawa tiou to mateen inim igharau. Patajani naol to nambaad di, nene nalib pa ndiran tonanan.

1Kor 4:9+; 2Kor 4:11,

6:4+

²⁴ Daba to yes Yuda tilos ghou pa ravraav pa liim wa. Ve sawa enaenja to tilos ghou, tilos ghou pa tamoot ee saangul liim ve paan (39).† *Lo 25:3*

* **11:22:** Saveen 'Hibrua' ve 'Israela,' pughudi raraate maau. Hibrua, nene Abaram papaghu toni. Ve saveen 'Israela,' nene injarua ghurla todi. Yes to Maaron igham di tinim le, ve titaghon tutuun toni, tiwaat taudi tighaze yes Israela. Ve ndug ndug tiwaat di tighaze 'Yuda.' † **11:24:** Tutuun to Mose isaav tovene: Ighaze tilos tamtoghon eta, yes irau tilosi pa tamoot ru (40) ve izi. Irau timalaan pa 40 ve izala maau. Tovenen sawa to yes Yuda tilos Paulus, tingal mata kat.

²⁵ Yes Roma tigham toon ve tilos ghou pae tol wa. Ve sawa eez, ival tikor yaam ve tirab matin ghou. Sawa tol, you naza waan ve niraav nila le waan imbiris ila te pogho. Ve sawa eez, namoghan ila te pogho pa mbon eez, ve ndag eez. *Mban 14:19, 16:22+, 27:41*

²⁶ Sawa naol to nalaghlaagh, patanani naol tinjarua ghou ve rismoghon tone namaat. Yawaanja ivot toman tapiri le rismoghon izugua ghou nalagleg. Moghon moghon yubyubnja, ve yes Yuda to yeinja ndug ee moghon, ve yes to Yuda maau ne paam tizuarua di tighaze tiwaghamun ghou. Tovenen ighaze naneep ila ndug tintina, ma nalaghlaagh izi ndug balim, ma naza waan ve naraav ila te pogho, nene patanani ighamgham ghou tovene. Ve tamtoghon to titoom ve tigham taudi tinimale tonvetaz to Krisi, yes tigham patanani tiina payou paam. *Mban 9:23, 13:50, 20:3, 23:12+*

²⁷ Moghon moghon, you narabrab taug pa uraat, ve nagheen pooi maau. Ve sawa naol, naneep sami, ve murun ghou ve pitool ghou. Ag aniih maau. Ve monenjaan ighamgham ghou pasa, leg nonogiinja poia eta to nandud ghou pani maau. *Mban 20:31; 2Kor 6:5*

²⁸ Patanani naol tonowen, to tinig moghon. Ve mbab ite paam ighamgham patanani payou. Pasa, sawa isob, you naghhamgham ngar naol pa lupuun tisob to Krisi, ve lolog imbumbu padi.

²⁹ Ighaze tamtoghon eta ghurla toni iyaryaan maau, nene igham ghou nayamaan taug naghaze tapirig isob. Ve ighaze tiweu toit eta ve igham sosor, nene igham ghou ateg yabyab kat.

³⁰ Ighaze ngar tiam iyaryaan aghaze napait taug, nene poia. You pale nataghon ngar tiam. Eemoghon sawa to napait ghou, you pale nasavia mbeb pida to tipatoon ghou tighaze you tapirig imbool. *2Kor 12:5,9+*

³¹ Tiina toit Yesu Krisi Tama Maaron, iit irau tapait iza irau sawa isob. Ye iwatag: Saveen tiou tonene, kaarom maau. Onoon moghon. *Ro 1:9+; 2Kor 1:23*

³² Sawa to naneep izi ndug tiina Damaskus, gavana to kinik Aretas ighuri inim nginiin pa ndug tonowen, ye ighur ndaaba pida pa tingin ataam to ndug, lesu tikis ghou.

³³ Eemoghon nditag pida tizeev ghou nala nakaral tiina lolo, ve tigham ghou nila pa marai saambu to ineep ila didiin tiina to ndug dige, ve titug ghou nazi nala. Tauto ye ikis ghou maau, ve naghau nala. *Mban 9:23+*

12

Paulus isavia tandagiin toni

¹ Onoon, you naghita naghaze ngar to tapait tauud izaad, nene iuul ghiit maau. Eemoghon leg ataam ite paam maau pasa, yam lolomim pa ngar tovene. Tauto you pale naseen saveen tiou, ve nasavia mbeb pida to Tiina toit Yesu ivotia di payou ila tandagiin.

² You nawatag ngeu eez to Krisi. Ndaman saanjgul ve paan to ila wa, Maaron iiti iza ila sambam to sala le sala kat.*

Ve you nawatag maau. Ngeu tonowen tau iza ila ve ighita pa mata, ma itandag moghon? Maaron moghon to iwatag.

³⁻⁴ Tovenen ngeu tonenen, Maaron iiti iza ila ndug toni to paghuna le paghuna kat. Ve nasaav muul. Nawatag maau. Ngeu tonenen tau iza ila ve ighita pa mata, ma itandag moghon? Maaron moghon to iwatag. Sawa to ineep tonowe, ye iloon saveen to mbeb pida. Mbeb tonowen, ighaze tatoova pa tasavia di, nene pale taraua maau. Pasa, saveen eta irau ivotia mbeb tonowen tighazon maau. Ve mbeb ite. Mbeb tonowen, ledi ngalsekiinj. Tamtoghon eta to taan irau ivotia di maau.

⁵ Ngeu to mbeb tonowen ivot pani, you irau napaiti. Eemoghon irau napait taug maau. You naghaze nasavia mbeb pida to tipatoon ghou tighaze tapirig imbool. Mbeb tonene moghon to napait ghou padi.

2Kor 11:30

⁶ Tovenen you lolog pa napait taug maau. Eemoghon ighaze naghams tovene, nene pale naghams ngar to borouja maau. Pasa, saveen to nasavia pa napait taug, nene onoon. Eemoghon lolog pa ngar tovene maau. Pasa, lolog pa

* **12:2:** Saveen waaro tonene, Paulus isavia tau. Ye lolo pa ipait tau maau. Tauto iwaat tau iza maau, ve ighuri iza to ngeu ite. Saveen to Paulus imbooda, isaav tovene: “iza ila sambam to inim tol pani.” Yes Israela ngar todi tovene: Sambam tol tinepneep. Eez, nene soso to man tirovroov ila. Ite inim ru, nene soso to ndag, kaiyo ve pitum tineep ila. Ve inim tol pani to ineep sala le sala kat, nene ndug sambam to Maaron ineep pani.

tamtoghon tipait izag sorok malep. Naghaze tighita n̄gar to naghami ne, ve tiloon saveen̄ tiou. Ve ighaze tighita gabuag ve tipait ghou, nene poia.

Sawa to tapiriid imbool, Kriisi ipapalot ghiit, leso tayoon ariana

⁷ Maaron ivotia mbeb popoia katindi payou. Eemoghon ye lolo pa napait taug pa n̄gar to igham payou ne malep. Tauto ipul Sadan iwaghamun ghou pa patañani eez to tinig. Patañani to ighamgham ghou, nene inimale mban̄oon̄a to Sadan. Ingal̄gal ghou inimale waar mata mata, leso napait taug kat sob. *Ga 4:13+*

⁸ Patañani tonene, you naghason Tiina toit pae tol naghaze ipaghaua ighau payou.

⁹ Eemoghon ye isaav payou ighaze: “Maau. Poia tiou to izaza tiom, nene iraua. Ukaal sa mbeb muul? Yes to tapiridi imbool, nene you irau napatoon̄ tapirig ivot ighazoon̄ kat ila todi.” Tovenen ighaze tapirig imbool, nene tinig iza, ve napakur ghou. Pasa, sawa to taug tapirig imbool, nene Kriisi tapiri tiina ineep tiou. *2Kor 11:30; Pil 4:11+*

¹⁰ Tovenen ighaze tapirig imbool, ve tamtoghon tipamayan̄in ghou, ve tigham samin ghou, ve tighur patañani payou, nene lolog poia. Pasa, sawa to tapirig imbool, Kriisi ipapalot ghou pa tau tapiri. Tauto nayoon ariana. *Ro 5:3; 2Kor 13:4*

Paulus igham n̄gar naol pa yes Korin

¹¹ Wais, yam Korin agham ghou nasavia saveen̄ to boroun̄a wa. Inimale yam apait ghou pa uraat tiou, tone poia. Eemoghon yam agham tovene maau. Onoon, you n̄geu sorok. Eemoghon yes mban̄oon̄a to yam aghita di aghaze izadi tintina,

yeiņa raratema. Sa nğar to yes tighami, nene you naghami paam. *2Kor 11:5*

¹² Nğar ve uraat to naghami ila lolomim, nene ipatoon ghou ighaze you mbanooņa tau to Krisi. Pasa, nayoon ariana pa badoon patañani, ve Maaron ipalot ghou ve naghām mbēb gharatoonadi ve uraat tintina tivotvot. Tauto ipatoon ghou ighaze ye ineep toman ghou pa uraat tiou. *Mk 16:17+; Ro 15:19*

¹³ Laak, you naghām sa sosor payam? Nğar ee moghon to naghām payam, to ite ris pa nğar to naghām pa lupuuņ pida to Krisi. Nene nayok pa aghām leg atia maau. Naghām tovene pasa, lolog pa naghām patañani payam maau. Ighaze yam aghita aghaze nğar tiou tonenen denja maau, ghorō apul sosor tiou! *2Kor 11:9*

¹⁴ You nangig gham pae ru wa. Ve aazne, matag iņgal naghaze natal naghita gham muul inim pae tol. Ve irau naghām patañani eta payam maau. Pasa, lolog pa naghām mbēb tiam maau. You naghām nğar pa yam taumim. Naghaze lolomim inim tiou, ghorō poia. Aghita. Ndipain tindou mbēb pa tiuul nditamandi ve nditinandi? Maau. Yes tineep ila nditamandi ve nditinandi nimadi. *2Kor 13:1*

¹⁵ Tovenen ighaze you narei taug toman mbēb tiou pa nauul gham, nene lolog poia moghon. Ma vena? Nğar tiou to lolog payam kat, tauto ighām gham lolomim payou kat maau ne? *Pil 2:17; 1Tes 2:8*

¹⁶ Tovenen you lolog pa naghām patañani payam maau. Tauto nayok pa aghām leg atia maau. Yo, saveeņ tonene imuul sualen. Tala kat

sob.

You nawatag: Ndiran pida to tineep toman gham, tingal saveeŋ payou tighaze: “Ngeu tonowen, ye iraua kat pa kaarom. Onoon, ye iyok pa tagham le atia maau. Eemoghon inim itombaan ghiit, ve iyou yaam to tanjooga pa ulaan ne, ve ighami inim le!”

¹⁷ Saveeŋ todi tonowen, you nakankaan pani. Yes to nambaan di tilat tiam, todi eta inim ataam payou pa natombaan gham ve nayau mbeb tiam? Maau.

¹⁸ Onoon, you to napalot Titus naghaze ilat. Ve nambaan tonvetaz toit ite ilat tomani. Vena, Titus itombaan gham ve iyou mbeb tiam? Yam awatag: Ye irau igham ngar tovene maau. Ve yeru Titus, ngar tiei ve gabuamai raraate. *2Kor 8:6, 8:16+*

Ngar pida to yes Korin to Paulus lolo pa ighita maau

¹⁹ Vena, yam aghaze saveeŋ to nimbooda ila rau tonene, nene pa nipoon taumai? Maau. Yei nisavia saveeŋ tonene ila Maaron mata itaghon Krisi ngar toni. Pasa, yei nineep ila to Krisi. Yam tonvetaz, lolomai payam kat. Tovenen ngar isob to nighami ne, nene pa iuul gham ve ipalot gham.

²⁰ Eemoghon you namatughez: Sawa to ighaze nalat, pale naghita ngar tiam le irau lolog maau. Ve ighaze tovene, nene pale nayaan gham, ve naghim ngar to irau lolomim maau. Pasa, matag ingal naghaze sawa to nalat, you pale naghita gham aghamgham ngar samsamia naol tovene: Awazoran gham, ve avalag gham aneep lemim lemim, ve ngar tiam iyaryaan aghaze atatan nditamim ve agham di titaghon ngar tiam moghon. Ve

atemim yabyab, agham n̄gar pa taumim moghon, an̄galn̄gal saveeñ pa nditamim, anin avomim padi, apapait taumim izamim, ve aghamgham n̄gar samsamia pida paam to tireureu lupuuñ tiam. *1Kor 4:21; 2Kor 10:2*

²¹ Ve namatughez pa mbeb ite paam: Ighaze namuul nalat, ve naghita gham agharaat taumim sone, nene pale Maaron ipamayan̄in ghou ila matamim. Ghorololog ipatañan ve natañ pa ival tiina to tigham sosor, ve titoor n̄gar todi sone. Nene nasavia yes to n̄gar todi in̄galaan̄ maau, ve matadi samia tinimale n̄gavuun, ve tila pa naghodi moghon ve tighamgham n̄gar samsamia naol. *2Kor 13:2*

13

Tan̄gabiiz poian tauud pa ghurla toit

¹ You nalat naghita gham pae ru wa. Ve aazne, naghaze naghama laghoon̄ tiou ite muul inim tol. Leso nawatag katin n̄gar tiam. Pasa, Maaron aliñ isaav tovene:

“Tamtothon ru ma tol irau tighita mbeb pa taudi matadi ve tipariaan̄ saveeña, ghorotaghur ila taghaze nene onoon.” *Lo 17:6*

² Sawa to nalat naneep toman gham inim pae ru, you nasaav ariana payam naghaze apatum gham pa n̄gar to aghamghami. Ve aazne, naneep mala, ve nasaav muul. Ighaze namuul nalat, ve naghita yes to muun̄ tigham sosor titoor n̄gar todi sone, nene irau naghurghur di maau. Pale naghur patañani padi. Ve yes moghon maau. Tamtothon pida to aazne tighamgham sosor ne paam, irau naghurghur di maau.

³ Aazne, n̄gar tiam iyaryaṅ aghaze le aghita mbeb eta inim ghilalooṅ payam. Leso awatag aghaze you navotia Krisi aliṅa payam. Tovenen yam pale aghita. Eemoghon Krisi tapiri ineep saguan payam maau. Ye ighamgham uraat ila lolomim toman tapiri tiina. Ve yam aghilaala maau.

⁴ Onoon, sawa to Krisi imaat izala ai pambarooṅ, tamtoghon tighita tighaze ye le tapiri maau. Eemoghon Maaron tapiri ipamundigini pa mateeṅ, ve aazne ye ineep mata iyaryaar. Yei tovene paam. Tapirimai imbool. Eemoghon nineep ila to Krisi, tauto Maaron tapiri ipapalot ghei pa uraat tiei, lesu niuul gham. *2Kor 12:9; Pil 2:7+*

⁵ Aṅgabiiz poian taumim: N̄gar to aghamghami ne, ipatooṅ gham ighaze yam aghur ila, ma maau? Ve yam irau aghilaal aghaze Krisi ineep ila lolomim, ma maau? Anumeer taumim sorok malep. Pa vene, aghur ila maau ma venen.

⁶ Ve yei nighur ila tovene: Ighaze aṅgabiiz ghei, nene pale aghilaal ghei aghaze yei mbaṅooṅa tau to Krisi.

⁷ Yei nighason Maaron pa ipalot gham, lesu agham n̄gar samia muul sob. Pasa, nighaze le n̄gar tiam isob denja ila ye mata. Ve ighaze tamtoghon tiṅgabiiz ghei tighaze yei mbaṅooṅa tau to Krisi, ma tighaze yei nigham kaarom pa uraat tiei, nene mbeb sorok. Eemoghon yam irau ataghon katin n̄gar denja, ghoru agham ghei lolomai poia.

⁸ Pasa, yei irau nizoor saveeṅ onoon maau. Yei nineep pa nipariaaṅa.

⁹ Tovenen ighaze tamtoghon tighita ghei tighaze tapirimai imbool, nene poia. Eemoghon nighaze yam ayoon ariana pa ghurla tiam, ghoru lolo-

mai poia. Tauto sawa isob, nighurghur gham ila sunjuunj tiei, ve nighason Maaron pa igham uraat payam le ngar tiam isob denja moghon ila mata.

¹⁰ Saveenj tonene, aazne naneep saguan ve nambooda ilat tiam. Pasa, lolog pa nalat ve naghamsaveenj ariana payam maau. Onoon, Tiina toit ighur gham ila sambag. Eemoghon ye lolo pa nawaghamun tamtoghon malep. Ye ighur ghou pa uraat tonene, leso napalot tamtoghon, ve ghurla todi ivot inim tiina ve iyaryaanj. *1Kor 4:21; 2Kor 2:3, 10:2,8*

¹¹ Yam tonjvetaz, naghaze napasob saveenj tiou. Yam asob aloonj saveenj palotiinj tiou tonene, ve lolomim poia, agharaat ngar tiam, alup lolomim inim ee moghon, ve ataghon ngar luuma. Leso Maaron to lolo ineep toit, ve igham ghiit taneep poia toman lolood luuma, ineep toman gham. *Ro 15:33; Pil 2:12, 3:1; 1Tes 5:16*

¹² Tovenen lolomim poia pa taumim, ve awakisin nimamim* itaghon ngar to iit tamtoghon to Maaron. *Ro 16:16*

¹³ Maaron tamtoghon toni to tineep sualen, tigham ndag poia todi ilat.

¹⁴ Poia to Tiina toit Yesu Krisi iza to yam asob, ve ngar to Tamaan Maaron to lolo ineep toit ne ineep toman gham, ve Avuvu Patabuanj ilup gham anim ee moghon. Onoon.

* **13:12:** Paulus imbood saveenj tovene: 'Aghan avomim.' Nene ataam todi to tipatoonj tighaze lolodi pa taudi. Ve iit tagham tovene maau. Tayanjin pa tamtoghon, ve itinja tawakisin nimaad.

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 18 Apr 2025 from source files dated 31 Aug 2023

c7a45d99-91a2-564f-9c55-d2efc8be7fae